

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIV No. 9  
Hunyo 7, 2003  
[www.philippinerevolution.org](http://www.philippinerevolution.org)

*Editorial*

## Dugang ginaarmasan sang US ang rehimeng Arroyo

**D**ugang nga ginasulsulan sang imperyalismong US ang militarismo sang rehimeng Macapagal-Arroyo. Paagi sa \$357 milyon nga kabilugan nga kantidad sang ayuda militar nga ginapangako ihatag sang gubyernong US, gusto sini nga labi pang pasingkion sang reaksyunaryong rehimen ang todo gera sa Mindanao, Mindoro, kag iban pang bahin sang pungsod.


Sa pagbisita sining Mayo ni Gloria Arroyo sa iya amo nga si Presidente George W. Bush sang US, nagbaton ini sang regalo para sa iya wala duda nga pagkapapet sa imperyalismong US. Nagpahayag sang lubos nga kalipay si Bush sa todo-todo nga pagsuporta ni Arroyo sa "pangkalibutanon nga gerang anti-terorista" kag sa pagsalakay kag pagsakup sang US sa Iraq. Ginpalakpakan man ni Bush ang deklarasyon ni Arroyo sang pagpasulong sang todo gera sa Pilipinas batuk sa mga rebolusyonaryong kahublagan nga ginapamunuan sang PKP kag MILF.

Bilang padya sa iya pagkatam-pad nga idu, ginpabutyag ni Bush nga isa na kuno ka mayor nga

alyado sang US sa guwa sang North Atlantic Treaty Organization ang Pilipinas, sa kubay sang Japan kag Australia. Gindugangan man ni Bush ang mga instrumento sang pagpamigos sang gubyerno Arroyo. Ini na ang pinakadaku nga limos nga nabaton sang sin-o man nga papet nga presidente sugod sang ginpalayas ang mga base militar sang US sadtong 1992.

Nagaabot sa \$47 milyon ang subsidyo sang gubyernong Bush sa rehimeng Arroyo para sa paglunsar sang Balikatan 03-1 sa Sulu subong nga Hunyo ukon Hulyo. Duha ka milyon dolyar (\$2 milyon) naman ang nakatalana sa "rehabilitasyon sang Sulu," ukon ang sangkap pangsaywar pagkatapos manghalit ang mga tropang US kag AFP sa prubinsya.

Gindugang pa gid sa arsenal sang pagpamigos nga ginregalo ni Bush ang 15,000 ripleng M16, maluwat sa 15,000 naunang ginpadala sadtong Abril; \$30 milyon para sa paghahas kag pag-armas sang mga *light reaction company, light reaction battalion* kag SEALs (mga tropang komando) sang Philippine Navy; 33 helikopter



***Mga tampok sa isyu nga ini...***

**Mga kadalag-an sa rebolusyong agraryo sa Samar**  
PAHINA 5

**Kabutigan sa likod sg gera sa Iraq**  
PAHINA 7

**13 armas, naagaw sa reyd sa Misamis Oriental**  
PAHINA 11

pangkombat; kwarta sa pang-kumpunir sa mga ini kag sa mga eroplano, trak kag barko de-gera nga daan ginpangako sang US; kag \$10 milyon para sa mga paghanas kag kagamitan sa "gera kontra-terorismo"-buot hambalon, sa paniktik kag pag-pamigos sa mga nagabatu sa estado.

Wala sang ibang tuyo ang amo nga ayuda kundi hatagan dugang nga ikasarang ang rehimeng Arroyo para maglunsar sang mabangis nga operasyon militar nga ginakinaiyahan sang wala untat nga pagpamomba, pag-panganyon kag pag-atake sa pumuluyo labi na sa kaumhan. Magakahulugan ini sang pagpasingki sang pagpanalbeyds sa mga lider kag aktibistang masa, kag pagpaniktik kag pagpamigos sa mga militanteng organisasyon.

Sadtong bisperas sang pagkadto niya sa US, ginbando ni Arroyo ang mandu niya nga bombahon kag kanyunon ang mga lugar nga gindaduhan ginabasehan sang Moro Islamic Liberation Front (MILF) sa Mindanao. Napulo ka adlaw nga ginbalbal sang malaparan nga operasyong militar ang



apat ka prubinsya sa Mindanao, nga nagresulta sang pilit nga paglikaw sang masobra 400,000 sibilyan. Masobra 60 sa mga nag-ebakwet ang nagkalamatay sa gutok kag mahigko nga *evacuation center*, kadam-an mga bata. Bug-os kalipay naman nga ginapatuman sang papet nga si Arroyo ang tanan nga ginasugo sang iya amo bangud nakuha na niya ang pinakahandum nga bendisyon para magpadayon sa poder. Pinakaulihi sa mga tikang niya ang pagkasugot sa gubyr-nong US sadtong Mayo 13 nga indi ipaidalum sang Pilipinas ang sin-o man nga Amerikano sa pagbista sang International Criminal Court.

Paborable para sa US nga magpabilin si Arroyo sa poder agud

padayon nga mapasingki ang armadong pagpasilabot sang US sa Pilipinas.

Ano man nga adlaw mahimo ideklara na ni Arroyo nga "nagbag-o na ang iya desisyon," nga "indi niya matalikdan ang hangkat sang panahon" ukon ang "tawag sang katungdanan," kag siya magapadalagan na sa pagkapresidente sa 2004. Sa amo man, ginahanda sang US si Defense Sec. Angelo Reyes bilang reserbang kabayo pananglitan wala na matuod sang paglaum nga mapadaog si Arroyo sa eleksyon.

Nagsala gid sanday Arroyo kag Bush sa pagsigahum nga matapna ang pagbatu sang pumuluyo kag rebolusyonaryong hublag paagi sa dugang nga bala kag baril. Wala nahadlok ang Bagong Hangaway sang Banwa sa pagbaton sang AFP sang mas madamo nga armas halin sa US. Madamo sang mga ini pat-ud magakadto man sa mga Pulang hangaway paagi sa mga ginalunsar nga taktikal nga opensiba batuk sa mga pasistang tropa.

Nagsala man sila kon ginalauman nila nga madula sa paminsaron sang pumuluyo ang malala nga pangpulitika kag sosyo-ekonomikong krisis sa paagi sang mumho nga "ayudang pangkauswagan." Dugang pa gani ginapainit sang teroristang kampanya sang US kag sang rehimen ang gera sibil sa Pilipinas kag ang patriyotikong diwa sang malapad nga masa sang pumuluyo.

Wala sang anuman nga maganar si Gloria Arroyo sa iya makahuluya nga pagdilap sa amo nga imperyalista kundi ang pagsikway sa ila sang pumuluyo kag ang pagbutang sa iya sa indi mabayluhan nga lugar bilang isa sa pinakamalaut nga idu-idu sang imperyalismong US sa kasaysayan sang papet nga republika. AB



Tuig XXXIV No. 9 Hunyo 7, 2003

Ang **Ang Bayan** ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

**[www.philippinerevolution.org](http://www.philippinerevolution.org)**.

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: **[angbayan@yahoo.com](mailto:angbayan@yahoo.com)**

## Kaundan

### Editorial

Ginaarmasan sg US ang rehimeng Arroyo **1**

Presensyang militar sg US **3**  
Mga atake sg AFP sa MILF **4**

### Mga Koresponsal

Rebolusyong agraryo sa Samar **5**

### Sa Luwas sang Dagat

Kabutigan batuk sa Iraq **7**

Bag-ong planong nukleyar sg US **8**

Propagandista sg imperyalismo **9**

Pagpanortyur sa mga Iraqi **9**

Daw pelikulang *Rambo* **10**

**Balita** **11**

Ang **Ang Bayan** ginabantala duha ka beses kada bulan sang Komite Sentral sang Partido Komunista sang Pilipinas.

# Mas daku nga permihang presensya militar, ginaduso sang US

**T**um-ok subong sang US nga padakuon pa ang presensya sang mga tropa sini sa Southeast Asia kag pila pa ka rehiyon kag pabaskugon ang ikasarang nila nga mangin mahulag kag mas madasig nga magsaylo-saylo halin sa subong nila nga mga base militar. Ini ang ginhambal ni Deputy Defense Sec. Paul Wolfowitz sang US sa paghingapos sang Asian Security Conference nga ginhiwat sa Singapore sining Mayo 31.

Suno kay Wolfowitz, ginahimo subong sang US ang "maid-id nga pagtasa kag pagreorganisa sang subong nga latag sang mga pwersang militar sini, labi na sa Southeast Asia.

Sa ila pagtasa, kulang ang presensya sang militar sang US sa rehiyon. Solo ang mga tropang Amerikano sa Mindanao ang kitaon nga presensya militar sang US sa rehiyon subong. Ang iban pang pwersa sini nakabase sa Northeast Asia (Japan kag South Korea) kag lunsay nakatumod sa North Korea. Umpisa nga ginpalayas ang duha ka base militar sang US sa Pilipinas, nagpakontento na ang US sa pagmentenar sang mga barko de-gera sa kadagatan sang Asia-Pacific bilang garantiya pang-seguridad kag paagi sang madasigan nga pagpusisyon sang mga tropa sini sa rehiyon.


Ginaplano sang US nga palig-unon ang presensya sini sa Southeast Asia sa paagi sang paglatag sang malapad nga lambat sang magagmay nga taktikal nga base nga ginatawag sini *deployment bases* ukon *forward operating bases*. Plano nga tukuron ang mga ini sa Pilipinas, Vietnam, Singapore, Malaysia kag Australia. Sa partikular, plano kuno sang US nga magbase sang mga tropa pangduta sa Pilipinas kag tropa nabal sa Vietnam. May plano man ang US

nga buhinan ang 20,000 katawong pwersa sa base militar sini sa Okinawa, Japan kag sayluhon ang madamo halin didto sa igatukod nga *forward operating base* sa Pilipinas.

Ginkumpirma man sang upisina sang Defense Minister sang Australia nga ginpaabot na sang US ang plano sini nga palaparon kag palig-unon ang presensya militar sa ila pungsod. Sa partikular, ginahingyo sang US ang pagbase sang mga eroplano panggera kag sang 5,000 tropang Marines sa Australia. Sa subong, may pila na nga eroplano panggera kag tropang pangduta nga nakasul-ob sa mga base militar sang Australia.

Daan nga gintalakay sang madalom ang topiko nga ini sa dokumento "Rebuilding America's Defenses" nga ginpagguwa sadtong Septyembre 2000 nanday subong Bise Pres. Richard Cheney, Defense Sec. Donald Rumsfeld kag iban pa nga yabing upisyal sang US. Sining karon lamang ginbantala ang dokumento sa peryodikong *Sunday Herald* sa US sa tunga sang mga redispusisyon sang tropa militar nga ginaplano sang US.

Indi man kuno nagakaigo ang pagpabaskog lamang sang subong nga presensya nabal sa kadagatan sang Asia-Pacific ukon ang pagsan-



dig sa subong nga tropa militar nga nakaistasyon sa rehiyon. Para sa mga katuyuan militar kag pangpulitika, nagakadapat kuno mag-istasyon sang pwersa pangduta kag pangkahanginan nga mataas ang ikasarang mangin mahulag (*rapidly mobile*) partikular sa Southeast Asia.

Ang mga pwersa nga ini magaserbi nga suplementaryo ukon pangsupta sa mga tropa nga permanente nakaistasyon sa Japan kag Korea. Suno man sa dokumento, ginakinahanglan indi magnubo sa kusog-brigada ukon kusog-rehimento ang nakaistasyon sa nasambit nga mga taktikal nga base sa ano man nga panahon agud "epektibo makahimo sang mga tradisyunal nga operasyon pangduta samtang ginapabilin nga mataas ang ikasarang mangin mahulag sang nasambit nga pwersa."

Ang pagatukuron nga *deployment bases* ukon *forward operating bases* magaserbi man nga pusisyanan sang mga kagamitan panggera.

Indi kinahanglan magsugod sa wala ang paglatag sang amo nga mga taktikal nga base. Suno sa

dokumento, mahimo makigsul-ob na lamang ang US sa nakatindog na nga mga base militar sang pungsod nga pagahukmongan (ukon *host country*), nga "paus-wagon" na lamang. Ipasakbat sang US sa *host country* ang aktwal nga "pagpauswag" kag iban pang gagmay nga galastuhan sa pagtukod sang base. Agud dugang makakinot, pagamiton sang US ang armadong pwersa sang *host country* agud imentinar ang nasambit nga base. Ang ano man nga dugang nga gastos para sa amo nga pag-areglo mahimo bilangan nga bahin sang "ayuda pangseguridad" sa nasambit nga pungsod. Sa sini, gilayon, madali kag makinot nga matukod ang mga taktikal nga base.

Ginahambal man sa dokumento nga matuod sa umpisa magaserbi pangsuyporta lamang ang *deployment bases*, mahimo pa nga palaparon sang US ang mga ini base kinahanglanon. Kumparar sa mga permanente nga base, mas mabaton man

ang amo nga pleksible nga klase sang mga base labi na sa pila nga nagapang-alang-alang nga alyado sang US.

Sa Pilipinas, bisan indi pa ipakakas sang US ang mga prubisyon sa konstitusyon nga nagadumili sa mga dumuluong nga base militar kag armas nukleyar, ang amo nga mga taktikal nga base sa subong mahapos matukod sa paagi sang mga nagaluntad nga kasugtanan pareho sang Mutual Defense Treaty, Military Assistance Pact, Mutual Logistics Support Agreement kag Visiting Forces Agreement. Sa amo pa man, ginduso gihapon sang US ang pagbag-o sa konstitusyon sang Pilipinas agud dugang pa nga maghalog para sa ano man nga posibilidad nga magtukod sang mga permanente nga base militar sa pungsod sa palaabuton. Sa subong mahawanan ang dalan para sa mas malaparan, mas mabaskog kag mas direktahan nga interbensyon militar sang US sa pungsod. AB

*Sa pihak sang untat-lupok*

## Padayon ang atake sang AFP sa MILF

**D**irektahan nga ginbalibaran kag padayon nga ginabalewala sang rehimenng Arroyo ang deklarasyon sang Moro National Liberation Front (MILF) nga 10 adlaw nga untat-lupok halin Hunyo 2 agud hatagan dalan ang liwat pagbukas sang sugilanon pangkalinungan sa tunga sini kag sang Gubyerno sang Republika sang Pilipinas (GRP).

Sa baylo, ginmandu ni Arroyo sa AFP nga dugangan pa ang mga atake batuk sa MILF. Ginapilit man ni Arroyo ang MILF nga pumirma sa isa ka "pinal nga kasugtanan pangkalinungan" nga nagatalana sa pagsurender sini sa rehimen, pagpangdakup sa mga pwersa sang MILF nga nagahimo kuno sang mga pagpangbomba kag paghayag sang ila mga pusisyon-nga lunsay imposible sundon sang MILF.

Bangud sini, halos pat-ud na nga maibasura ang sugilanon pangkalinungan. Siling ni Ignacio Bunye, tagapamaba ni Arroyo, ano man nga adlaw posible pormal nga bilangan sang GRP sa listahan sini sang mga

"terorista" ang MILF kag lubos isara na ang negosasyon.

Isa ka adlaw matapos ianunsyo sang MILF ang plano nga untat-lupok halin Hunyo 2 tubtub Hunyo 12, gimbomba sang mga eroplaciong OV-10 Bronco kag Tora-Tora sang AFP ang isa ka baryo sa Butig, Lanao del Sur. Madamo kuno nga tinawo sang MILF ang nasamaran, suno sa matag-as nga upisyal sang militar.

Mabaskog ginkundenar sang Muslim Multisectoral Movement for Peace and Development ang pagpangbomba. Suno naman kay Al Haj Murad, Vice Chairman for Military Affairs sang MILF, pat-ud nga mga sibilyan ang naigo sa mga

pagpangbomba bangud wala ang MILF sa lugar.

Suno kay Murad, gindeklarar sang Komite Sentral sang MILF ang untat-lupok bilang sabat sa panawagan pangkalinungan sang Catholic Bishops Conference of the Philippines, Bishops-Ulama Conference kag iban pa nga nagasakdag sang kalinungan sa Mindanao. Nagpaandam man si Ghadzali Jaafar, Vice Chairman for Political Affairs sang MILF, nga mangin daku nga kasaypanan sang gubyernong Arroyo kon indi sini positibo sabton ang untat-lupok.

Samtang wala pa ang untat-lupok, ginpadayon sang MILF ang mga gerilyang atake sini sa AFP agud batuan ang mga wala untat nga opensiba militar sang rehimen. Sadtong Mayo 31, pitong elemento sang CAGU ang namatay sang ambuson sila sang mga gerilyang MILF sa South Upi, Maguindanao. Sadtong Mayo 29 naman, tatlo ka suldado kag 12 elemento sang CAGU ang namatay sang salakayon sang MILF ang duha ka magkalapit nga detatsment sang 40th IB sa Carmen, North Cotabato. Nakaagaw ang MILF sang duha ka garan kag isa ka M16. AB



# Mga kadalag-an sa rebolusyong agraryo sa Samar

*Ang masunod amo ang una sa serye sang mga artikulo bahin sa mga kadalag-an sa rebolusyong agraryo sa Samar.*

**G**inapanginpuslan subong sang masang mangunguma ang mga benepisyong hulu-halintang nga pagpatuman sang matuod nga reporma sa duta sa mga sona kag baseng gerilya sa Samar. Sa isa ka bahin sang baseng gerilya sini nga kumbinasyon sang malapad nga palayan kag niyugan, pursigido kag sustenido nga ginasulong sang mga mangunguma ang antipyudal nga paghimakas sa lebel baryo kag interbaryo.

Bunga sang mga benepisyong naagum sang mga mangunguma sa paglunsar sang rebolusyonaryong reporma sa duta, ang kahimtangan nila subong malayo na ikumparar sadtong bag-o mag-abot ang una nga yunit sang BHB sa lugar sadtong ulihi nga bahin sang 1977.

Sadto, sa pihak sang manggad sang duta, nagaantos sang sobrang kabudlayan ang masang mangunguma bunga sang pyudal nga pagpanghimulos. Permi

nga bugana ang ang ani bisan simple lamang ang kagamitan sa produksyon. Halimbawa, makaani sang 40-50 sako nga palay sa kada ektarya bisan wala patubig ukon abono. Kadam-an sa mga baryo makaani sang 3,000 tubtub 10,000 sako sang palay kada anihan. Ugaling 30-40%

sini ang mabilin sa baryo. Daku nga bahin ang ginahakot

padulong sa mga bodega sang mga agalon nga mayduta sa poblasyon. Samtang, ang gamay nga parte sang masang mangunguma amat-amat nagakaubos sa pagbayad sang mga utang bangud sila ang nagapas-an sa daku nga gastos sa produksyon. Sa parte man nga ini ginakuha sang mangunguma ang mga pang-adlaw-adlaw nga basehang kinahanglanon.

Monopolisado sadto sang siyam ka pamilya nga agalon nga mayduta ang mga prinsipal nga kagamitan sa produksyon pareho sang duta kag karbaw. Tag-iya sila sang 40-50% sang mga palayan kag niyugan kag 80% sang mga karbaw sa lugar.

Ginatalana sang mga agalon nga mayduta ang mataas nga renta sa duta kag kagamitan sa produksyon, manubo nga suhol kag mahaba nga oras sa pagtrabaho, mataas nga interes sa pautang kag sobrang ganansya sa mga paninda.

**Tatlo ka halintang.** Nag-agi sa tatlong halintang ang marikot kag sa pila ka hitabo nga madinuguon ang paghimakas sang mga mangunguma sa lugar agud bag-uhon ang kahimtangan nga ini.

► *Unang hut-ong (1978-1985):* Kumprehensibong ginsulong ang rebolusyong agraryo. Mabaskog ang reaksyon sang apat sa siyam nga agalon nga mayduta nga naganag-iya sa mas o menos 2,000 ektaryang kadutaan. Nag-upod sila sa mga operasyon militar





kon sa diin pila ka lider-manunguma ang ginpatay sang kaaway kag madamo nga mangunguma ang nag-ebakwet kag nag-estar sa kagulangan. Sa amo pa man, wala mag-untat ang ila paghimakas kag naglapta pa ini sa iban nga lugar.

► *Ikaduhang hut-ong (1985-1992)*: Nadula ang bwelo sang mga antipyudal nga paghimakas bangud gintum-ukan sang BHB ang pangunahon nga atensyon sa di napanahon nga "regularisasyon" kag insureksyunismo.

► *Ikatlong hut-ong (1993-2002)*: Liwat ginhatagan-igtalupangud ang antipyudal nga paghimakas sa ubay sang Ikaduha nga Dungganon nga Kahublagan Pagpanadlong sang Komite Sentral sang Partido. Kag bangud sa pagsulong kag pagpagsik liwat sang mga antipyudal nga paghimakas, natukod ang mga lubos nga organisasyong masa.

Masunod ang mga pila sa mga kadalag-an nga naagum nila:

**Napanubo ang renta sa duta.** Sadto, 50-50 ang kinaandan nga partehanay sa palayan. Ang solo ginasabat sang agalon nga mayduta amo ang katunga sang suhol sa mga mamumugon sa uma samtang sa agsador tanan ang trabaho kag sa pagkaon.

Sa niyugan, ginbaliskad ang anay partehanay nga tersyo (1/3 sa agsador, 2/3 sa agalon nga mayduta). Tuman ka mapanghimulos ang partehanay sadto bangud tanan nga gastos kag trabaho pas-an sang agsador.

Gintinguhaan man masistematisa ang pagdumala sang organisasyong masa sa mga kumpiskado nga kadutaan nga di magmenos sa 500 ektaryang humayan kag niyugan. Bangud diri, daku nga bahin sang kita halin sa mga kadutaan nga ini

ang nagakadto na sa masang mangunguma.

**Napataas ang suhol.** Ang suhol sa pagtrabaho sa humayan, niyugan, pagtuksi abaka, paglagare kahoy kag pagpamanday napataas sang 33% sa minimum halin sa anay P50 tubtub P100 kada adlaw nga kadam-an wala pagkaon.

Halimbawa, sa pagtanum sang palay, napataas pakadto P50 halin sa anay P5 ang bayad sa kada 100 metro kwadrado. Ang paghakot sang isa ka sako nga humay sa kasarangan nga layo ginabayaran na subong sang P20 halin sa anay P2 lamang. Ang bayad naman sa paghakot sang por kilo napasaka halin sa P0.50 pakadto P1.00. Ang pagsaka tubtub pagbunot sang niyog ginabayaran sang P30 kada isa ka gatos buo halin sa anay P5. Napataas man ang suhol para sa walo ka oras nga trabaho sang mga mamumugon sa uma halin P50 pakadto P200 subong.

**Kontra usura.** Amat-amat man ginadula ang mataas nga interes sa pautang kag sobra kadaku sang ganansya sa komersyal nga paninda. Sadto, tatlo ka bulan pagkatapos sang ani, napilitan na mangutang ang masang mangunguma sa mga komersyanteng usurero bangud nagakaubos na ang ila parte nga humay kag kinahanglan nila sang galastuhon sa masunod nga tigtalanum.

Ang isa ka sako nga humay nga gin-utang bag-o ang ani ginabayaran sadto sang duha (100% interes) tubtub tatlo ka sako (200%). Subong, isa kag tunga ka sako (50% tubo) na lamang ang ginabayad diri. Ang daan nga sistemang 5-6 ukon 20% bulanan nga pagtubo sa utang nga kwarta napanubo pakadto sa 10% interes na lamang. Sa mga mas malaut nga kaso kon sa diin ang utang nga P50 ginabayaran sang isa ka sako

humay (P350 ukon 600% interes), tunga sa sako ukon P175 na lamang ang ginabayad. Madamo nga duta sang mga mangunguma ang nagkadto sadto sa mga agalon nga mayduta-usurero bangud sa pagpanghakab kag mataas katama nga interes sa pautang sa porma sang prenda nga 50% ang tubo. Sa subong, amat-amat na nga nabawi sang mga mangunguma ang mga naprenda nga duta.

Ang ganansya sang mga komersyante sa mga paninda napanubo halin 50% pakadto 10% na lamang. Sang wala pa ang rebolusyonaryong hublag, 30-300% ang ginadugang nila. Sa pihak nga bahin, napataas man ang presyo sang produkto sang masa. Ang anay P15 kada kilo ngas karne ginabaligya na subong sa presyo nga P70 kada kilo.

**Mga kooperatiba.** Malahaloon sa pagpasulong kag pagkonsolida sang mga kadalag-an sa antipyudal nga paghimakas ang natukod nila nga mga kooperatiba sa pautang, sa hayupan, sa pagbaligya sang ila produkto kag pangkonsyumer. May komunal nga ulumahan man sila. Amo sini ang ila paglantaw:

"Ginapauswag sini ang pang-ekonomya nga aktibidad para sa kaayuhan... sang katapuan sang organisasyong masa kag masang mangunguma. Nagaserbi ini nga katuwang nga paagi sa huluhalingtang nga pagbawi sang pyudal kag malapyudal nga pagpanghimulos sa lugar. Nagaserbi ini nga binhi sang kooperatibisasyon sang agrikultura kag amat-amat pagbag-o sa daan nga sistema sang produksyon."

Bunga sang mga kadalag-an nga ini sa rebolusyong agraryo, nailatag ang paborableng kondisyon sa pagpasulong sang armadong paghimakas, pagtukod sang

Partido kag hilikuton sa nagahili-ugyong prente sa kaumhan tubtub sentrong banwa.

Makit-an ang madalom kag malapad nga suportang masa sa armadong paghimakas pangunahon na sa pagpatuhaw sang mga Pulang hangaway para sa BHB. Sa kamatuoran, ang madamo nga rekrut sang BHB naghalin sa mga baryo nga may mga kongkretong benepisyong sa rebolusyonaryong reporma sa duta. Mapagsik sila nga nagasuporta kag sa pila ka kahigayunan direktang nagapartisipar sa mga taktikal nga opensiba sang BHB.

Makit-an man ang pagbulig sang masa sa matag-adlaw nga mga kinahanglanon sang hangaway sang banwa. Ginaasikaso man sini ang pagbulig sa mga pamilya sang mga Pulang hangaway.

Ginaamligan man sang masa ang seguridad sang dalagkuan nga pagtilipon sang mga kaupod nga ginahiwat sa mga abante nga baryo, pareho sang mga pagtuon, pulong kag paghanas sang mga kadre kag hangaway.

Bangud sa ila nagapadayon nga paghimakas, madamo nga mangunguma kag mamumugon sa uma ang narekrut sa Partido kag madasig ang pagtukod sang mga sanga sang Partido sa lokalidad. Nakapatuhaw kag nakahanas man sang mga lokal nga kadre kag sa sini, natukod ang seksyon komite.

Ang mga mangunguma kag mamumugon sa uma indi lamang nagahulag bilang mga pwersa sa antipyudal nga paghimakas kundi nagapasakup man sa mga antipasista kag anti-imperyalistang paghimakas. Halimbawa sini ang mga kampanya batuk sa nagaigting nga militarisasyon kag pagsuporta sa mga hayag nga paghimakas sa mga sentrong banwa kag syudad.

AB

## Kabutigan sa likod sang gera sa Iraq

**Dugang nabuyagyag ang kabutigan sang ginasugid *weapons of mass destruction* sa Iraq**

**A**gud makuha ang internasyunal na suporta para sa gera sa Iraq, ginbangdan sang US kag UK ang kuno pagtago sang gubyernong Saddam Hussein sang *weapons of mass destruction* (WMD). Pero duha ka bulan matapos okuparon ang Iraq, wala pa sang maipakita bisan gamay lang nga WMD ang mga mananakup.

Bangud sini, nagakadasma subong ang US kag UK nga magpatuhaw sang ano man nga pamatuod nga naghimo sang WMD ang anay gubyerno sang Iraq. Agud indi mahuy-an, nanarisari nga balibad ang ginapagguwa subong sang mga upisyal sang US kag UK.

Sining karon lang, ginbuyagyag sang mismo mga ahensya paniktik sang UK nga ginpilit sila sang rehimeng Blair nga idugang sa ila *dossier* ang kabutigan nga may ikasarang ang rehimen ni Saddam nga ilunsar ang ginakaptan sining WMD "sa sulod sang 45 minutos." Gingamit ni Blair ang "impormasyon" nga ini agud pahugon ang pumuluyong British kag ipamilit ang gilayon nga paglunsar sang aksyong militar batuk sa Iraq.

Suno mismo kay Defense Sec. Donald Rumsfeld sang US, matuod nga wala sang makit-an nga *weapons of mass destruction* bangud ginsamad na kuno ni Saddam ang mga ini bag-o pa man ang gera. Dugang naman ni Deputy Defense Sec. Paul Wolfowitz, ginamit ang *weapons of mass destruction* bangud ini lamang ang pwede pagaisahan sang tanan nga paksyon kag ahensya sang gubyernong US. Si Wolfowitz ang pinuno sang espesyal nga komite nga gintukod sang rehimeng Bush agud magpangita sang pinakamayo nga bangdanan agud salakayon kag okuparon ang Iraq. Dugang pa subong nabuyagyag nga ang ginasugid nga presensya sang WMD puro kabutigan kag himuhimo lamang.

Sining Mayo 30, ginbuyagyag sang masmidya sa United Kingdom nga pila ka adlaw bag-o magatubang sa United Nations Security Council si State Sec. Colin Powell sang US, likum siya nakigpulong kay Foreign Minister Jack Straw sang UK.

Sa nasambit nga pagpulong, pareho nagpahayag sanday Straw kag Powell sang mabaskog nga reserbasyon sa mga ginpresentar nga report-paniktik nahanungod sa





kuno presensya sang WMD sa Iraq. Sa ila pagsugilanon, nag-isa ang duha nga indi bastante ang nakalap nga ebidensya kag indi husto nga ginapresentar sang mga report ang aktwal kag obhetibong kahimtangan.

Sa pihak sang kakulangan sang nagakaigo nga impormasyon, nag-atubang si Powell sa UN Security Council kag ginbuyagyag ang kuno mga ebidensya nga may WMD sa Iraq. Ang nasambit nga impormasyon nakalap kuno sang ila mga ahensya paniktik. Ang matuod, kadam-an sang ginpakita ni Powell nakabase lamang sa *dossier* nga ginhandang kag ginhayag sa publiko sang rehimeng Blair sang UK sadtong Enero.

Daku nga bahin man sini indi resulta sang maidid nga pangalap kag pag-usisa sa datos paniktik kundi

ginkopya lamang halin sa tesis sang isa ka estudyanteng Amerikano.

Subong nga bistado na ang kabutigan bahin sa WMD, nagatudluanay ang Defense Intelligence Agency (DIA) sang US kag ang Pentagon kon sin-o ang may kasal-anan sa hitabo. Ginaakusahan sang DIA ang Pentagon sa pagpatuyang sa \$30 bilyon *intelligence funds* sang US kag pagtiko sang mga datos agud magsanto ini sa adyenda pangpulitika sang rehimeng Bush batuk sa Iraq. Hungod kuno ginbalewala sang Pentagon ang kadam-an nga datos halin sa DIA kag ginpadaku ang yadto naghaling sa Iraqi National Congress, isa ka grupo nga madugay na ginapondohan sang US agud pukanon ang gubyerno ni Saddam Hussein. AB

## Bag-ong plano nukleyar ni Bush

**Samtang nagapostura tagapangapin sang kalibutan batuk sa WMD, nagaplano ang US nga maghimo sang isa ka bag-ong nukleyar nga arsenal**


**G**inaduso subong sang Pentagon ang paghimo sang labing una nga mga bag-ong tipo sang armas nukleyar sang US halin sang matapos ang Cold War.

Duha ka plano ang ginapresentar sang Pentagon. Una, plano sini nga retokehon ang mga daan nga *warhead* agud hatagan ikasarang ang mga ini nga makawasak sang mga *bunker* sa dalom nga 1,000 piye. Ikaduha, gusto sini magdisenyo sang *mini-nukes* ukon magagmay nga armas nukleyar nga santo sa pag-away sa talaguan sang mga armas kemikal kag *biological*. Kwarenta'y sais ka milyon dolyar (\$46 milyon) ang ginapropener nga gastuhon sang Pentagon para sa plano sa tuig 2004.

Ginabawal sang kongreso sang US sining nagtaliwan nga dekada ang paghimo sang *mini-nukes* sa kabalaka nga mas gamiton ang mga ini nga wala hawid-hawid.

Sining nagligad nga bulan, nakumbinse na ni Bush ang Senado sang US nga kuhaon ang pagdumili sini. Ginatalakay man ang amo nga hambalanon sa House of Representatives.

Ginapamilit sang administrasyong Bush nga ang subong nga nukleyar nga arsenal sang US gindisenyo para manguba sang mga syudad. Wala kuno ini ikasarang magsuhot sa idalom sang duta kon sa diin kuno ginahimo kag ginatago sang mga pungsod pareho sang Iran kag North Korea ang ila *weapons of mass destruction*. Indi man kuno



epektibo nga pamugong sang atake ang subong nga arsenal. Tanyado kuno sang mga kaaway sang US nga indi sini paggamiton ang subong nga mga armas nukleyar bangud sa mabaskog nga internasyunal nga oposisyon sa lapnagon nga kahalitan nga tugahon sini.

Ang matuod nga gusto sang rehimeng Bush nga halugan ang renda sa paggamit sang mga armas nukleyar agud mas madali makulbaan kag malutos ang mga ginakabig nga kaaway sang US.


Mas madali paggamit sang mas magagmay kag mas matanda nga armas nukleyar bangud mas magamay man ang kahalitan nga igabunga sang mga ini kumpara sa nga daan nga tipo sang armas nukleyar. Gusto tugahon sang US ang kahimtangan kon sa diin ang mga armas nukleyar magamiton anong oras nga gustuhon nga daw mga ordinaryo nga hinganiban lamang. AB

# Higanteng propagandista sang imperyalismo

**Pila dalagku nga kumpanyang masmidya sa US ang walay huya nagaserbi tagapamaba sang militaristang gubyernong Bush**

**D**aku ang gintungdan nga papel sang midya sa pagpalapnag sang imperyalista kag reaksyunaryong panan-awan kag panindugan. Maathag ini sa ginhimo nga *coverage* sang pinakadaku nga *media network* sa US sa "gera kontra-terorismo" sa pangkabilugan kag sa pagpanalakay sang US sa Iraq sadtong Marso sa partikular.

Sa pareho nga hitabo, bilang katuwang sa pagpalapnag sang nanarisaring importasyon kag haum-haum kag "limpyuhon" (*sanitize*) ang dala nga silut sang imperyalistang gera sa kabuhi kag pangabuhian sang pumuluyong Iraqi.



Ang mga reporter nga *embedded* ukon nagahulid sa mga yunit militar sang US amo ang nagaserbi nga tagapamababa sang nasambit nga mga yunit. Paagi sa ila, ginsalaming sang 24 oras kada adlaw nga *coverage* sang mga higante nga *media outlet* ang kalkulado nga propaganda sang CIA kag Pentagon. Ginalakpakan sang Fox News, CNN kag MSNBC ang kada gamay nga aksyon sang mga suldadong Amerikano sa Iraq kag ginalimita ang pagreport sa mga opinyon kag hitabo nga nagabangga sa upisyal nga bersyon sang CIA kag Pentagon. Nangin alagyan ang mga ini sang pinakamalaut nga porma sang propaganda sang CIA kag Pentagon, kalakip ang mga mala-pelikula nga iskrip kag palaguwaon (*Lantawon ang kaangot nga artikulo*).

Sa pihak nga bahin, gingamit sang mga *media network* ang ila "mahirup" nga relasyon sa mga tropang Amerikano agud padayon makapagguwa sang mga *footage* nga *sensationalized* kag subong lamang makit-an kaangot sa mga pili nga hitabo kag pahayag sang mga upisyal militar sa paglaum nga makauna sa ila mga karibal kag makaganyat sang mas madamo pa nga tumalan-aw kag bumalasa nga wala hinalung-ong.

## Mga sundalong British, nantortyur ng mga Iraqi

**G**inaimbestigahan subong ang ginatos-gatos nga tropang British, lakip ang mga upisyal kag kumander nga imbolbado sa pagpanalakay sa Iraq pagkatapos mabuyagyag ang mga insidente sang pagpamigos kag pagpanortyur sang mga ini sa mga nadakup nga sibilyan kag suldado nga Iraqi.

Sining Mayo, nakuha sa isa ka suldado ang pila ka retrato nga nagapamatuod sang pagpamintas kag pagpamigos sang isa ka grupo sang suldadong British sa ila nabihag sa gera. Sa isa ka retrato, ginbitay sa *forklift truck* nga ginamaneho sang isa ka suldadong British ang isa ka nakagapos kag ginbusalan nga Iraqi. Makit-an sa retrato ang isa ka "nalipay gid nga suldadong British." Ang iban nga retrato nagpakita sang pila ka Iraqi nga nakahublas kag ginapilit maghimo sang aktong sekswal sa mga suldado nga British ukon di gani sa kada isa samtang nagalantaw ang iban pa nga suldado.

May ara man nga retrato sang duha ka hublas nga Iraqi nga nagaduko sa dakung kakulba. Bag-o ini, nabuyagyag ang kapintas ni Col. Tim Collins, kumander sang isa ka batalyon nga nakaistasyon sa Basra, batuk sa mga sibilyan nga Iraqi. Saksi indi lamang ang iya tinawo, kundi pati ang mga tropang Amerikano nga nakaistasyon man sa Basra sa nasambit nga panahon, sa pagpangbakol ni Collins sa isa ka lider Iraqi, pataratas nga pagpalupok kag pagpamahog sa iba pang sibilyan kag pagpapamaril sa ruweda sang mga salakyan sang sibilyan.



# Daw pelikulang Rambo

**M**aluwas sa engrandeng kabutigan bahin sa *weapons of mass destruction*, nabuyagyag man ang pagpadihut sang CIA kag Pentagon sang mga himu-himo nga estorya kag palaguwaon para palutawon ang kuno kahustuhan sang pagpanalakay, kabaganihan sang mga suldadong Amerikano kag kapintas sang mga pwersang Iraqi.

Tampok sa mga kabutigan nga ini ang masunod:

**Ang pagpukan sa rebulto ni Saddam Hussein.** Sadtong Abril 9, tatlo ka simana matapos suguran sang US ang pagpanalakay sa Iraq, ginsulod sang mga tropang Amerikano ang syudad sang Baghdad.

Sadtong adlaw man, ginbrodkas sang imperyalistang midya nga daw malipayon katama nga pagsaulog sang pumuluyong Iraqi sa pagpahalin kay Saddam Hussein kag daw ispontanyo man ang pagkapukan sa higanteng rebulto niya sa isa ka parke sa tunga sang Baghdad.

Paliwat-liwat kag wala untat ini nga ginpakita sa mga telebisyon sa bug-os nga kalibutan bilang pamatuod sang kuno lapnagon kag malaparan nga pag-alsa sang pumuluyong Iraqi batuk sa rehimen ni Saddam Hussein. Ginpabugal ini nanday Presidente Bush sang US kag Prime Minister Blair sang UK. Pamatuod kuno ini sang mainit nga pagbaton sang pumuluyong Iraqi sa pagsakup sang mga tropang Amerikano sa Iraq kag pagsulod sa Baghdad. Halin sa "pila ka dosenang pumuluyo" sa umpisa, nangin "pila ka libo" tuhtub "linibu-libong Iraqi" na sa ulihi ang ginareport nga nagpasakup sa dalayawon nga hitabo.

Sa mga report sang mga higanteng *media network*, bisan kis-a wala ginapakita ang kabugusan sang parke ukon bisan ang kabilugan nga pagtilipon man lamang sang mga tawo.

Pero nabuyagyag na subong nga ining hitabo isa lamang pagguwa sang CIA kag Pentagon nga nakadiseno para ipagguwa sa telebisyon.

Ginbantala sa internet sang isa ka retratista sang Reuters ang mga retrato nga ginkuha halin sa isa ka mataas nga bilding nga nagpakita sa kabug-usan sang parke. Kitaon kaayo nga masobra lamang gamay sa 100 katawo ang ara sa parke kag halos wala tawo sa mga syudad sang Baghdad. Ginpalibutan sang mga tropa kag tangke nga Amerikano ang parke kag sinarhan ang mga pasulod kag pagguwa sini. Solo ang nagabantay nga mga tropang Amerikano, sa salakyan nga ipangtumba sa rebulto, isa ka hubon sang kalalakihan nga Iraqi kag pila ka mamahayag nga bitbit sang mga pwersang US ang yara sa parke. Tago nga ginamit ang salakyan agud butungon kag pukanon ang rebulto sa paagi sang kable bangud indi ini masarangan butungon sang gamay nga tawo ukon tumbahon paagi sa pila ka maso. Nakita man kag ginreport sang pila pa ka mamahayag pareho mga taga-*Time Magazine*, nga ang kalalakihang Iraqi nga upod sang mga suldadong US indi mga residente sang Baghdad kundi mga myembro sang Free Iraqi Forces (FIF) nga nakabase sa iban nga pungsod, ginsakay sa eroplano sang Pentagon kag ginpasulod sa Iraq para sa palso nga pagsaulog.



Ang FIF isa ka grupo nga bayaran sang CIA kag ginapamunuan sang pangunahon nga papet sang US nga si Ahmed Chalabi.

**Ang pantastiko nga "pagsalbar" kay Pvt. Jessica Lynch.** Mas temprano pa, ginpagguwa sang CIA kag Pentagon, sa paagi man sa kapot nila nga midya, ang himu-himo nga istorya nahangud sa kuno pagsalbar sang US Special Forces sa isa ka suldadong Amerikano nga nabihag sang mga pwersang Iraqi.

Sugod sadto daw sine nga ginbalay sang midya nga kontrolado sang CIA/Pentagon ang istorya bahin sa kuno pagpalagyo ni Lynch. Sa bibig nila permi ang iskrip sang CIA/Pentagon nga "padayon nga nagbatu si Lynch kutob sa iya ikasarang." Base kuno sa mga pahayag sang mga "wala ginhingadlan nga upisyal militar," nag-angkon si Lynch sang madamo nga igo sang bala kag ginbuno pa siya sang mga suldadong Iraqi.

Gindugang pa nila nga wala kaluoy nga mapintas nga Iraqi sa kahimtangan ni Lynch. Nahibal-an lamang nila kuno ang kahimtangan ni Lynch bangud sa maayong-buot ng isa ka abugado nga Iraqi nga naglakat sang pila ka gatos ka milya pakadto sa isa ka tsekpoynt sang mga Amerikano agud ipahibalo nga kapot sang mga Iraqi

si Lynch kag iban pang suldadong Amerikano. Sa sini, ginbalay kuno ang plano nga operasyon militar sang US Special Forces kag ginsulod nila ang ospital sa tungang gab-i agud salbaron si Lynch.

Pero sining Mayo, ginbuyagyag sang iban nga mamahayag ang palso nga estorya nga ini. Sa isa ka imbestigasyon nga ginhimo kag ginbrodkas sang British Broadcasting Corporation (BBC), nabuyagyag nga wala sang kon ano nga igo sang bala kag bunong si Pvt. Lynch. Sa baylo, nabalian siya sa braso kag hita kag naglisa ang iya bukobuko sang bumaliskad ang iya ginasakyan nga salakyan. Naaksidente ini kag nakabulag sa komboy sang mga trak sang suplay sang magbaskog ang *sandstorm* (bagyong sang balas).

Suno sa imbestigasyon sang BBC, duha ka adlaw antes ang "pagsalbar," ginbayaan sang mga suldadong Iraqi ang ospital kag ginbilin nila sa mga doktor nga Iraqi si Lynch. Gintatap siya sang maayo sang mga doktor nga Iraqi. Gilayon man ginpatundaan sang mga doktor sa mga suldadong Amerikano ang kahimtangan medikal ni Lynch kag ginkumpirma ini sang mga Amerikanong doktor nga nag-usisa sa iya. Suno sa mga gin-interbyu sa mga istap kag doktor sang ospital, gintinguhaan nila nga idul-ong si Lynch sa pinakamalapit nga tsekpoynt sang mga Amerikano, ugaling ginpalukpan lamang ang ila ambulansya gani napilitan sila nga bumalik sa ospital.

Amo na lamang ang pagkakibot sang mga doktor kag istap sang nasambit nga ospital sang gulpe dumagsa ang mga suldadong Amerikano sa bululngan kag nakipag-away didto sang wala naman kaaway.

Daku nga kapalsuhan ang abi mo pelikulang Rambo ukon Arnold Schwarzenegger nga palaguwaon sang CIA kag Pentagon bahin sa "makahason kag maisog" nga pagsalbar sang mga suldadong Amerikano kay Lynch sa tunga sang "mabaskog nga lukpananay kag inaway." Daw samad-ulo nga nagasinggitan ang mga suldadong Amerikano, nagpalupok sang mga blangkong bala kag nagpalupok sang magagmay nga bomba. Gulpe nga mag-alihid ang isa ka *rescue helicopter* kag dali-dali sini ginsakay si Lynch. Samtang ginahimo ang peke nga pagsalbar, nagakuha ang iban nga suldado sang *video* gamit ang *night vision camera* kag ginbrodkas ini sang *live* sa Central Command sa Qatar. Gilayon ini gin-edit, ginpanagtag, ginpistahan sang midya kag ginpaguwa sa mga telebisyon sa bug-os nga kalibutan.

AB

## Reyd sa detatsment:13 armas, naagaw sang BHB

ANOM ka M16, pitong garan kag nanarisaring kalibre sang mga bala ang naagaw sang mga gerilya sang Julito Tiro Command sang BHB-Northern Mindanao sang salakayan nila ang detatsment sang 9th IB sa Sitio Lantaca, Barangay Kibanban, Balingasag, Misamis Oriental bandang alas nuwebe sang aga sining Hunyo 3.

Isa ka suldado ang napatay kag isa elemento sang CAFGU ang napilasan sa 30 minutos nga away. Halos kadungan man nga ginharas sang isa pa ka yunit sang BHB ang isa pa ka detatsment sang 9th IB sa sentro sang barangay.

Malipayon nga ginpanginbulahan ni Jorge "Ka Oris" Madlos ang BHB sa madinalag-on nga taktikal nga opensiba. Ginpanginbulahan man niya ang masa nga nagsuporta sa operasyon. Pila sa ila ang boluntaryo nga nagsunod sa operasyon kag nagbulig hakot sang mga barrel nga naagaw kag pagtatap sa mga napilasan.

Madugay na nga nakaatras ang mga Pulang hangaway sang mag-abot ang reimporsment halin sa 2nd kag 5th Special Forces Battalion kag 2nd Reconnaissance Coy nga suportado sang duha ka helikopter nga MG-520.

## Suldado imbolbado sa pagsalbeyds kanday Ka Eden kag Ka Eddie, gin-aresto

GIN-ARESTO sang National Bureau of Investigation si-ning Hunyo 3 si M/Sgt. Donald Caigas, isa sa mga suspetsado sa pagpatay kanday Ka Eden Marcellana kag Ka Eddie Gumanoy. Si Ka Eden, pangkabilugan nga sekretaryo sang Karapatan-TK kag si Ka Eddie, tagapangulo sang Kasama-TK, ginkuot kag ginsalbeyds sang mga tinawo ni Col.Jovito Palparan, kumander sang 204th Bde, sa Naujan, Mindoro Oriental sadtong Abril.

## Pagpatay sa upisyal sang Bayan Muna sa Isabela, ginkundenar sang BHB

MABASKOG nga ginkundenar sang Fortunato Camus Command (FCC) sang Bag-ong Hangaway sang Banwa-Cagayan Valley ang pagpatay kay Joaquin "Jake" Soriano, tagapamuno sang Bayan Muna sa Jones, Isabela. Si Soriano ginpatay sang mga suldado sang AFP sa iya balay sadtong Mayo 15 sa San Vicente, Jones sa mandu ni Gov. Benjamin Dy Jr. sang Isabela. Sa isa ka pahayag, ginkundenar man ni Victor Servidores, tagapamaba sang FCC, ang malisyoso nga aksusasyon sang AFP nga si Soriano ginpatay sang BHB.

## Batuk sa pagtaas sang matrikula, ginsuguran na

GINSUGURAN na sa pagpanguna sang League of Filipino Students (LFS) kag Anakbayan ang kampanya batuk sa panibag-ong pagtaas sang matrikula. Magaabot ini sa malapnagon nga aksyong protesta pagbukas klase sa Hunyo 16.

Suno sa LFS, may 317 pribadong unibersidad kag kolehiyo ang ginpahanugutan sang Commission on Higher Education (CHED) nga magdugang sang P22-66

kada yunit subong nga abre. Kinaandan may tatlo ka yunit ang isa ka *subject* kag nakaenrol sa lima tubtub walo ka *subject* ang isa ka estudyante sa kolehiyo.

Bangud sa pagtaas nga ini, madamo nga estudyante halin sa mga pribadong eskwelahan ang nagsalaylo na sa mga eskwelahan publiko. Pero suno sa CHED, magapataas man sang matrikula ang mga unibersidad sang gubyrno.

### 39% sg paman-on, wala makatuon sadtong 2002 -Anakbayan

TRENTA'y nuebe porsyento (39%) ukon 3.5 mily-on sa mga bata kag paman-on nga dapat naga-eskwela (edad 5-24) ang wala nakapaenrol sadtong 2002, suno sa pagtuon nga ginhimo sang Anakbayan. Kadam-an sa ila ara sa kaumhan.

Suno man sa pagtuon, 36% sang 30.2 milyon nga paman-on (edad 13-35) ang wala nakatuon kag wala sang masudlan nga trabaho sadtong isa ka tuig. Nakapaenrol ang 21% lamang sa hayskol, kolehiyo kag kursong bokasyunal. Sa mga may trabaho, 22% ang nagaobra sa talamnan kag 21% sa kasyudaran, nga kadam-an kontraktwal.

### Sobra pagpanukot sang Meralco, ginpakamalaut

WALA pa gani nabalik sang bilog ang P30 bilyon nga sobrang pagpanukot sang Meralco sa 3.4 milyon nga rehistradong konsyumer sini, ginpahanugutan liwat sang Energy Regulatory Board nga magsukot sang dugang nga P0.80/kwh ang kumpanya. Ini ang ginbuyagyag sang People Opposed to Warrantless Electricity Rates (POWER).

Ginkundenar man sang POWER ang pamaagi sang Meralco nga utay-utay nga pagbalik sa sobrang sukot sini. Siling sang POWER, dapat ibalik sang bilog, gilayon kag wala kondisyon ang utang sang Meralco sa tanan nga konsyumer. Dapat man bayaran kuno sang kumpanya ang maabot sa P2 bilyon nga interes sa sulod sang walo ka tuig nga pagpanukot sini sang sobra.

## Pahanugot para mangin kolateral ang ulumhan, ginhimo nga hagna

ANUM ka hagna nga nagasentro sa pagpahanugot nga gamiton kolateral sa pagpangutang ang mga duta sa idalum sang reaksyunaryong reporma sa duta ang yara subong sa kongreso kag senado. Kabahin ang mga ini sa mga pray-

oridad nga hagna sang rehimeng Arroyo sa iya *State of the Nation Address* sadtong Hulyo 2002. Kon mangin layi, may dugang nga paagi ang mga agalon nga mayduta nga bawion ang duta nga ginpanagtag sa idalum sang CARL

kag Presidential Decree No. 27. Sa mga hagna nga nakapasaka sa kongreso, mahimo nga temporaryong umahon sang nagpautang ang talamnan nga kolateral tubtub indi pa mabayaran ang utang sang mangunguma.

### Pulong sang G8, ginsug-alaw sang protesta

NAG-ABOT sa 120,000 ang nagprotesta batuk sa G8 nga nagmiting sa Evian, France sining Hunyo1-3. Ginpakamalaut nila ang globalisasyon kag ang pagpanakup sang US sa Iraq.

Mayo 29 pa lamang nag-umpisa na nga magprotesta ang linibulibo nga pumuluyo sa syudad sang Lausanne sa Switzerland. Nagsindi sila sang 50 siga nga ginatawag nila "kalayo sang protesta" sa palibot sang Lake Geneva sa lindero sang France-Switzerland. Nagtalabo sa bahin sang lindero sang Swiss ang mga martsa halin sa pungsod sang Annemasse sa France kag Geneva, Switzerland kag nagderetso sa France sadtong Hunyo 1. Nagpadayon ang protesta tubtub sa katapusan nga adlaw sang pulong sang walo ka pinakamanggaranon nga pungsod sa kalibutan: ang US, Britain, France, Germany, Italy, Canada, Japan kag Russia.

### Iran, ginaiitan sang US

MATAPOS ang sa Iraq, ginahandaan naman subong sang militaristang rehimeng Bush ang "pagbaylo sang rehimen" sa Iran. Ginalatag subong sang ila mga propagandista ang basehan agud ipakita nga demonyo ang pungsod kag ang mga lider sini. Suno sa US, nagahimo kag nagamentenar ang Iran sang mga armas nukleyar kag nagatago ini sa mga myembro sang al Qaeda nga nagpalagyo halin sa Afghanistan. Pero mismo sang Central Intelligence Agency nagahimutig sa mga ini.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIV No. 9  
Hunyo 7, 2003  
[www.philippinerevolution.org](http://www.philippinerevolution.org)

Editorial

## Dugang ginaarmasan sang US ang rehimeng Arroyo

**D**ugang nga ginasulsulan sang imperyalismong US ang militarismo sang rehimeng Macapagal-Arroyo. Paagi sa \$357 milyon nga kabilugan nga kantidad sang ayuda militar nga ginapangako ihatag sang gubyernong US, gusto sini nga labi pang pasingkion sang reaksyunaryong rehimen ang todo gera sa Mindanao, Mindoro, kag iban pang bahin sang pungsod.


Sa pagbisita sining Mayo ni Gloria Arroyo sa iya amo nga si Presidente George W. Bush sang US, nagbaton ini sang regalo para sa iya wala duda nga pagkapapet sa imperyalismong US. Nagpahayag sang lubos nga kalipay si Bush sa todo-todo nga pagsuporta ni Arroyo sa "pangkalibutanon nga gerang anti-terorista" kag sa pagsalakay kag pagsakup sang US sa Iraq. Ginpalakpakan man ni Bush ang deklarasyon ni Arroyo sang pagpasulong sang todo gera sa Pilipinas batuk sa mga rebolusyonaryong kahublagan nga ginapamunuan sang PKP kag MILF.

Bilang padya sa iya pagkatam-pad nga idu, ginpabutyag ni Bush nga isa na kuno ka mayor nga

alyado sang US sa guwa sang North Atlantic Treaty Organization ang Pilipinas, sa kubay sang Japan kag Australia. Gindugangan man ni Bush ang mga instrumento sang pagpamigos sang gubyerno Arroyo. Ini na ang pinakadaku nga limos nga nabaton sang sin-o man nga papet nga presidente sugod sang ginpalayas ang mga base militar sang US sadtong 1992.

Nagaabot sa \$47 milyon ang subsidyo sang gubyernong Bush sa rehimeng Arroyo para sa paglunsar sang Balikatan 03-1 sa Sulu subong nga Hunyo ukon Hulyo. Duha ka milyon dolyar (\$2 milyon) naman ang nakatalana sa "rehabilitasyon sang Sulu," ukon ang sangkap pangsaywar pagkatapos manghalit ang mga tropang US kag AFP sa prubinsya.

Gindugang pa gid sa arsenal sang pagpamigos nga ginregalo ni Bush ang 15,000 ripleng M16, maluwat sa 15,000 naunang ginpadala sadtong Abril; \$30 milyon para sa paghahas kag pag-armas sang mga *light reaction company*, *light reaction battalion* kag SEALs (mga tropang komando) sang Philippine Navy; 33 helikopter



**Mga tampok sa isyu nga ini...**

**Mga kadalag-an sa rebolusyong agraryo sa Samar**  
PAHINA 5

**Kabutigan sa likod sg gera sa Iraq**  
PAHINA 7

**13 armas, naagaw sa reyd sa Misamis Oriental**  
PAHINA 11